

23. apr. 2015

**Ilaqutariit meerartallit akornanni piitsuussuseq immikkut ukkataralugu aningaasatigut nali-
giinnginnerup piitsuussutsillu akiorneqarnissaanut iliussissatut pilersaarudioqqullugit
Naalakkersuisut peqquneqarnissaannik Inatsisartut aalajangiiffigisassaattut siunnersuut.
Iliussissatut pilersaarut kingusinnerpaamik UKA 2016-imut atatillugu
inaarsarneqareersimassaaq.**

(Inatsisartunut ilaasortaq Aaja Chemnitz Larsen, Inuit Ataqatigiit)

**Piitsuussutsip killinganik kingusinnerpaamik UPA 2016-imut atatillugu aalaja-
ngersaaqqullugit Naalakkersuisut peqquneqarnissaannik Inatsisartut aalajangiiffigisassaattut
siunnersuut.**

(Inatsisartunut ilaasortaq Aaja Chemnitz Larsen, Inuit Ataqatigiit)

Aaja Chemnitz Larsen inuit Ataqatigiit ilaqutariit meerartallit akornanni piitsuussutsip immikkut ukkataralugu aningaasatigut naligiinnginnerup piitsuussutsillu akiorneqarnissaanut Inatsisartut aalajangiiffigisassaattut siunnersuutaa ima Siumumiit oqaaseqarfigissavarput.

Kalaallit Nunaanni piitsuussutsip annertusiartornera innuttaasunut sumiikkaluartunut tamanut annertuumik eqquivoq. Ajuusaarnarluinnartuuvorlu meeqqat ilaatigut piitsuussutsip nassatarisaanik eqqugaasunut ilaammata, tamanna akuersaaruminaalluinnartuuvoq.

Taamaakkaluartorli ilaatigut piitsuuneq oqaaseq tunngavilersussallugu siammasissuuvoq. Tamatumali nassatarisaanik ersarissivoq innuttaasut atugaannik piitsuussutsip akiorneqarnissaa piviusunngortinneqassappat politikikkut anguniakkap piviusunngortinnissaa kisiat isumalluutigissallugu naammaqqajangitsoq. Innuttaasut atukkamikkut oqilisaanneqarnissamik pisariaqartitsippata taava aamma pisortaniit ikiorserneqartariaqarput atugarisamik pitsanngorsarnissaannut. Aamma namminneq nukissaqaleqqorlugit, taakkuuppummi susassareqatigiinnerup aqqani iliuseqaqataasussat. Pisariaqartitsillutik ikiortariallit inatsisit atuuttut naapertorlugit ikiorserneqartassapput, illuatungaaniilli kaasarfiit kaaginnarlugit naammagittaalliortoqartarnera taamaaginnartussatullu isigalugu inuulersimasut

akuersaaginnartassagutsigit tamanut artukkiinermik kinguneqartartoq ilisimavarput. Taamaammat aatsaat taamak pingaaruteqarluinnartigaaq nipi kaammattueraluttoq aamma inuit pissakittut akornanni atuutsissallugu. Tassami inuunermi aallartiffimmi angerlarsimaffik taannaavoq kinaassutsip ineriartulernerani pinngorfik aallaavillu.

Politikkikkut pisussaaffigaarput ajornartorsiutip akiorneqarnissaanut aqutissiueqataassalluta. Aqqummik tikkuussineq tassaavoq innutaasut piumassuseqarlutik atorluagassaat inerisaaqataaffigisassaallu.

Ullumikkummi siunissaq ungasinnerusoq illersorneqarsinnaasorlu isigissagaanni ilinniartitaaneq sakkussani pingaarnepaavoq. Taannaavoq tikkuussisoq piitsuussutsip ikitut alligaluttuinnarsinnaasup mamitikkiartulernissaanut. Taamaammat suliffissaqarniarnikkut sillimaniarneq sumiiffinni tamani Kommuunit peqatigalugit suleqatigalugillu sulissutiguartariqarpoq. Siumup pingaartippaa ilaqutariissuseq peqqissoq inerisaaqataaffigisallugu. Ilaqutariit peqqissut taakkuusarput suliffimmik paarsilluartut, ilinniagaqarnissamik pingaartitaqartut, pitsaasumik maligassiuisut, minnerunngitsumik kaammattuisut aqutissiueqataasullu. Taamak periuuseqarnerup piitsuussuseq ullumikkut ittoq pakkersimaartissinnaavaa nungutikkiartuaarsinnaallugulu.

Imminut pilersorsinnaaneq anguniarlugu suliniutit annertusartuartaqarput, sulineq aamma akilersinnaasariaqarpoq. Peqqinnartumik ullutsinnullu naleqquttumik ineqarneq aammalu inuuniarnermi atukkat pitsaasut pillugit suliniuteqartuartaqarpugut.

Meeqqat aningaasakilliorfimmeersut eqqarsaatigalugit Siumut isumaqarpoq siunissaq ungasinnerusoq eqqarsaatigalugu ileqqaagaqarnikkut katersaqarsinnaaneq tassaassasoq piitsuussutsip akiorsinnaaneranut aqutissat pingaaruteqarluinnartut ilaat.

Siunnersuutitut pineqartunut Naalakkersuisut akissuteqaataat Siumumiit paasilluarparput, aammalu maluginiarlutigu piitsuususeq akiorniarlugu tamatigoortumik Naalakkersuisut ingerlaavartumik suliniuteqartuarnissaq siunertarigaat. Siumumiit piitsuususeq aningaasaannartigut ikiorsiisarnikkut aaqqiivigineqarsinnaanngitsutut isigaarput. Taamaattumik ilinniartitaanikkut, suliffeqarnikkut inuussutissarsiornikkut, isumaginnilluarnikkullu ataqatigiissaarluakkamik suliniuteqarnertigut piitsuussutsip akiorneqarnissaa qaangerneqarnissaa upperaarput.

Taamannak oqaaseqarluta siunnersuut imm. 36 aappassaaneerneqartinnagu Ilaqutariinnermut Peqqissutsimullu Ataatsimiitsitaliamut suliarineqartussanngorlugu inassutigaarput, immikkoortumulli 37-imut tunngatillugu Naalakkersuisut allannguutissatut siunnersuutaat akuersaarlutigu.

Laura Táunâjik

Siumut